

Na a l'iniziativa – gea a la cuntraproposta

Il comite «Na a l'iniziativa da charvun nuschaivla» preschenta ses arguments

DA MARTIN CABALZAR

■ «Per ina politica d'energia grischuna prospectiva empè d'ina acziun malponderada. Sut quest titel ha in comite independent cun represchentsants da las partidas burgaisas lantschè ier a Cuira la campagna d'infurmaziun en vista a la votaziun chantunala dals 22 da settember. Il comite «Na a l'iniziativa da charvun nuschaivla – gea a la cuntraproposta» consista dals co-presidents *Silvia Casutt* (pcd), *Jon Domenic Parolini* (pbd), *Rudolf Kunz* (pld) e *Jan Koch* (pps). Els fan valair che la pretensiun da l'iniziativa «Na a l'energia da charvun» da franar l'engaschament da Repower tar il project da l'implant electric en Italia dal sid smanatschia l'indipendenza dal Grischun sco chantun d'energia, periclitetschia plazzas da lavur grischunas e chaschunia custs nunnecessaris. «Il comite refusa perquai la pretensiun radicala dals activists cunter il charvun e sustegn empè la cuntraproposta raschunaivla da la regenza», scriva il comite.

Betg periclitar ina ferma pitga da l'economia d'energia dal Grischun

Per il Grischun saja l'economia d'energia ina da las branschas las pli impurtantas. Ella haja rinforzà il chantun ed al haja fatg independent e cumpetitiv. Las entradas dal sector d'energia sajan centralas per il chantun e per las vischnancas. Cun Repower possedia il Grischun in'interpresa d'energia independenta che producescha, distribuescha e proveda ses clients cun electricitad. L'interpresa grischuna n'ha però betg mo success en la Svizra dal sidost, mabain er en Germania, Rumenia ed Italia.

Il Grischun è in tipic chantun d'energia, la svieuta da l'economia d'energia munta annualmain radund 1 milliarda, da quai derivan rodund 450 milliuns da la produziun, radund 250 milliuns dal provediment e radund 300 milliuns dal commerzi cun energia. Las entradas per il maun public or da l'economia d'energia muntan annualmain a passa 150 mililins, e quai senza resguardar las taglias dals collavuratur.



A chaschun da la tractaziun da l'iniziativa «Na a l'energia da charvun» en il cussegl grond aveva ina grupp d'activists da Greenpeace demonstrà cunter la participaziun da Repower a l'implant da charvun en Italia..

FOTO TH. GSTÖHL

Jon Domenic Parolini (pbd)
Dapi passa 100 onns è il vischin en il sid in partenari da Repower che vonda oz a l'Italia 6 giadas dapli electricitad che al Grischun. En emprima lingia saja quai a 40 000 interpresas pitschnas e mesauanas. «50 pertschient da la svieuta e 50 pertschient dal gudogn da Repower derivan da la fatschenta cun l'Italia e da quai profitetscha il chantun Grischun enormamain», constatescha Jon Domenic Parolini. Ultra da la distribuziun e da la vendita d'electricitad stoppia Repower però era garantir la produziun en l'Italia per avair vinavant success. «Ussa vegn la politica e vul tuttenina metter en chadainas l'interpresa d'energia grischuna che è fitg innovativa. A Repower duai schizunt vegnir scumandà cun effect retroactiv da sa participar ad in project che vegn tuttina realisà – cun u senza Repower, ha depulorà il deputà da la pbd Jon Domenic Parolini. «Sch'ina interpresa sco la Repower

sa fa valair cun success a l'exteriur, sch'ella risguarda la legislaziun vertenta da là e sch'ella stgaffescha en il Grischun bleras plazzas da lavur preziasas duessan nus sustegnair questa interpresa e franc betg l'impedir e la chastiar, sco quai ch'ina grupp d'activists cunter il charvun vul far», è s'exprimì Parolini.

Silvia Casutt (pcd)

L'exempel da l'iniziativa cunter las abitaziuns secundaras mussia, uschia la deputada da la pcd Silvia Casutt, ch'il chantun Grischun haja per il pli fatg nauschas experiencias cun iniziativas formuladas a moda pauc precisa. «En connex cun l'iniziativa da charvun vegn pretendì luccamain ch'il chantun possia alura lugar la chausa e decider libramain co ch'el veglia tractar il resultat da la votaziun», ha accentuà Silvia Casutt. Ella temia però in lung dispittim giuridic cun ina fin imprevisibla. Perquai refusia ella decidida-

main l'iniziativa da charvun. Sch'il chantun Grischun vegnia sfurzà da vender sia participaziun actuala a Repower, savessia quai avair consequenzas fatalas per tut il chantun: plazzas da lavur preziasas ch'ins ha pudì crear mo grazia a l'activitad internaziunala da Repower fissan periclitadas. «Quai na dastga dentant betg capitar», ha accentuà la deputada sursilvana. «Nus Sursilvans savain per tge ch'i va ils 22 da settember sch'il chantun vegniss sfurzà da vender sias cumparts. Pertge nus avain vis che mintga piazza da lavur che va a perder fa mal.»

Rudolf Kunz (pld)

Cun in scumond tecnologic immediat – sco quai che pretendan ils activists cunter il charvun – vegnissan dischavantagiads massivamain en confrunt cun la concorrenza chantunala ed internaziunala betg mo Repower, mabain tut las interpresas d'energia grischunas, ha ditg il schef da

la fracziun liberala Rudolf Kunz. «L'iniziativa nuschaivla va però anc pli lunsch, ed ins sto temair che tals scumonds vegnissan imitads er utrò», uschia Kunz. «Tgi che planisescha in project d'investiziun e sa fida da las reglas da gieuvantas, duess pudair sa laschar sin quellas e pudair esser segir che questas na vegnan betg midadas pli tard.» Per il maun public, però era per las interpreas e per ils manaschis industrials è indispensabla la garanzia dal dretg e da las investiziuns. Quai saja ina prestaziun centrala da noss stadi da dretgs.

Sche las cundiziuns da basa e las reglas da gieuvantas midadas posteriuramain – sco quai che l'iniziativa pretendia – haja quai consequenzas fatalas per ina regiun. «Talas pretensiuns extremas che periclitetschan nosa industria e nosas interpresas na dastgain nus betg acceptar, punctuescha Kunz concludend.

Jan Koch (pps)

Il chantun Grischun stoppia restar liber ed independent en quai che riguarda la politica d'energia, ha punctuà il deputà da la pps Jan Koch. In na dastgia betg esser ch'ina pitschna minoritad d'activists per l'ambient ensemen cun ina ferma lobi internaziunala prescriviva al chantun tge che lez haja da far areguard la politica d'energia. El ha regurdà al fatg che Repower tutgia tar las interpresas pionieras concernent l'ecologia e che l'interpresa haja promovì gia avant onns energias regenerablas. La politica na duaja perquai betg sa maschadar en la strategia d'ina interpresa, quai fineschia per il pli mal sco quai che mussia l'iniziativa da charvun, ha suttastritgà Koch. Mo la cuntraproposta da la regenza e dal cussegl grond possia evitar quai.

Il deputà Jan Koch ha perquai appellà da refusar l'iniziativa: «Ils 22 da settember dovri in cler na a l'iniziativa da charvun ed in cler gea a la cuntraproposta. Mo sche la cuntraproposta – sco cumpromiss raschunaivel – vegn acceptada, decida la dumonda da tagl. E mo sche la dumonda da tagl survegn avunda vuschs en favur da la cuntraproposta po l'iniziativa cunter charvun vegnir refusada.